


宋修吳郡志

廿八年五月刻遂興



吳郡志卷二十

人物

吳郡 范成大撰



春秋吳公子慶忌王僚之子以勇聞於世萬人
莫當走追奔獸手接飛鳥追之駟馬馳而不
及射之接矢而不可中僚死出奔闔廬得要
離用之為離所刺

被離吳王闔廬之臣楚白喜既入吳伍子胥言
於王以為大夫被離問子胥曰何見而信喜

子胥曰喜伯州犁之孫吾之怨與喜同子不聞河上歌乎同病相怜同憂相救不愛其所近悲其所思者乎被離曰吾觀喜之爲人鷹視虎步專功擅殺性不可親也子胥曰不然竟與共事喜卽伯嚭也

要離吳人闔廬憚慶忌在鄰國有萬人力恐合諸侯以害吳伍子胥乃進要離曰離雖細人有萬人力嘗見其折辱壯士椒丘訢於友人之喪席訢怒須臾往攻離離至舍誠其

妻曰我爲勇士椒丘訢於大家之喪餘恨蔚恚臆必來第勿閉吾門至夜椒丘訢果往見其門不閉登其堂不關入其室不守放髮僵卧無所懼訢乃手劒粹離曰子有當死之過三子知之乎子辱我於大家之衆一死也歸不關閉二死也卧不守御三死也子有三死之過欲無得怨要離曰吾無三死之過子有三不肖之愧子知之乎吾辱子於千人之衆子無敢報一不肖也入門不咳登堂無聲二

不肖也前拔子劔手挫摔吾頭乃敢大言三不肖也有三不肖而威我豈不鄙哉於是椒丘訢投劔而歎曰天下壯士也臣所聞要離若此吳王見之要離曰臣國東千里之人細小無力迎風則僵負風則伏大王有命臣敢不盡力吳王默然要離卽進曰大王患慶忌乎臣能殺之王曰慶忌之勇聞於世今子之力不如也要離曰王有意焉臣能殺之臣詐以負罪出奔願王戮臣妻子斷臣右手慶忌

必信臣王曰諾要離乃詐得罪出奔吳王乃取其妻焚棄於市要離乃奔諸侯以無罪聞於天下遂如衛見慶忌曰闔閭無道王子所知今戮吾妻子焚之於市無罪見誅吳國之事吾知其情願因王子之勇闔閭可得也慶忌信其謀練士卒遂之吳將渡江於中流要離力微坐慶忌上風因風勢以矛鈎其冠順風而刺慶忌慶忌顧而揮之三摔其頭於水中乃加於膝上曰嘻天下之勇士也乃敢加

兵於我左右欲殺之慶忌止之曰豈可一日而殺天下勇士二人哉可令還吳以旌其忠於是慶忌死要離渡江愍然不行謂從者曰殺吾妻子以事吾君非仁也爲新君而殺故君之子非義也何面目以視天下之士言訖遂投身於江未絕從者出之要離乃自斷手足伏劍而死

吳太子友故夫差太子也夫差將伐齊令國中曰敢諫者死太子友知子胥忠而不用太宰

嚭佞而專政欲切言之恐懼尤乃諷諫王清旦懷從從九持彈從後園來衣袷履濡王怪問之太子曰適遊後園聞秋螿之聲往觀之秋蟬登高樹飲清露隨風攜撓長吟悲鳴自以爲安不知螿蜋超枝緣條曳腰聳距而稷其形螿蜋翕心而進志在有利不知黃雀徘徊枝陰跼蹙微進欲啄螿蜋黃雀但知伺螿蜋之有味不知臣挾彈飛從從九而集其背臣但志黃雀不知空塢其旁陷於深井臣故袷體

濡履焉大王笑曰天下之愚也但貪前利不
覩後患太子曰愚復有甚吳徒知踰境征伐
不知越王將選死士出三江之口入五湖之
中天下之危莫甚於斯王不聽

壽越吳子壽夢臣魯襄公五年使于晉請聽諸
侯之好晉人遂爲之合諸侯魯衛皆來會于
善道

季扎吳子壽夢子諸樊之弟諸樊既除喪將立
季扎辭曰昔曹人不義曹君將立子臧子臧

去之君子曰能守節扎雖不才願附於子臧
以無失節固立之棄其家而耕乃舍之扎遂
爲吳出聘諸侯以通嗣君至魯說叔孫穆子
知其不得死遂請觀周樂至齊說晏平仲至
鄭見子產如舊相識至衛說籛瑗史狗史鮒
公子荆公叔發公子朝曰衛多君子未有患
也至晉說趙文子韓宣子魏獻子曰晉國其
萃於三族乎說叔向曰吾子勉之君侈而多
良大夫必思自免於難初使過徐君徐君好

季扎之劔口弗敢言及還徐君已死解其劔繫之冢樹由是扎賢名聞天下其卒也孔子書其葬處曰嗚呼有吳延陵君子之墓至今傳於世

蹶由吳子餘祭之弟魯昭公五年楚伐吳蹶由犒師楚王執之將以釁鼓使問曰女卜來吉乎對曰吉寡君聞君將治兵於敝邑卜之以守龜曰余亟使人犒師請行以觀王怒之疾徐而爲之備尚克知之龜兆告吉曰克可知

也君若驩焉好逆使臣滋敝邑休息而忘其死亡無日矣今君奮焉震電馮怒虐執使臣將以釁鼓則吳知所備矣且吳社稷是卜豈爲一人使臣獲釁軍鼓而敝邑知備吉孰大焉乃弗殺以蹶由歸

掩餘吳公子也魯昭公二十三年吳伐州來楚及諸侯之師救州來吳公子光帥右掩餘帥左大敗楚及諸侯之師於雞父公子光弑王僚掩餘乃奔徐史記作蓋餘

燭庸吳公子魯昭公二十七年吳欲因楚喪而伐之使公子掩餘及燭庸帥帥圍潛吳師不能退公子光遂弑王僚燭庸奔鍾吾後與掩餘奔楚二人不與闔廬者也

夫槩王闔廬之弟也魯定公四年吳伐楚楚囊瓦禦之二師陳于栢舉夫槩王晨請於闔廬曰楚瓦不仁其臣莫有死志先伐之其卒必奔而後大師繼之必克弗許夫槩王曰所謂臣義而行不待命者其此之謂也今日我死

楚可入也以其屬五千先擊囊瓦之卒楚師亂吳師大敗之吳遂入郢夫槩王後奔楚爲堂谿氏

子洩吳王夫差臣魯哀公八年帥師伐魯取武城

胥門巢王子姑曹展如皆吳王夫差臣哀公十一年巢將上軍姑曹將下軍展如將右軍戰于艾陵大敗齊師

太子友夫差子王子地王孫彌庸皆夫差臣魯

哀公十三年越伐吳爲二隊疇無餘謳陽自南方先及郊彌庸見姑蔑之旗曰吾父之旗也不可以見讎而弗殺也太子曰戰而不克將亡國請待之彌庸獲疇無餘地獲謳陽越子至復戰友與彌庸於姚皆死之

言偃字子游吳人孔子高第在文學之科嘗爲武城宰孔子過之聞弦歌聲笑曰割雞焉用牛刀子游曰昔者聞諸夫子君子學道則愛人小人學道則易使孔子曰偃之言是也今

言偃宅在常熟縣西常熟世傳一名琴川本弦歌之說故也餘見往蹟門

前漢用里先生吳人史記正義引周樹洞曆云姓周名術字元道太伯之後漢高帝時與東園公綺里季夏黃公俱出定太子號四皓史記正義用里先生一號霸上先生又云今太湖中洞庭山西南中有祿里村是史記正義

嚴忌吳人時謂之嚴夫子尊之如此

嚴助嚴夫子也郡舉賢良對策百餘人武帝

善助對擢爲中大夫時征伐四夷開置邊郡
助與大臣辨論中外相應以理義之文任用
尤親助侍燕從容上問居鄉時助對爲友壻
富人所辱上問所欲願爲會稽太守於是拜
爲會稽太守數年賜書曰君厭承明之廬勞
侍從之事懷故土出爲郡吏會稽東接海南
近諸越北枕大江間者闕焉久不聞問其以
春秋對助上書謝復留侍中
朱買臣字翁子家貧好讀書不治產業常艾薪

樵賣以給食檐束薪行且讀書其妻羞而去
買臣後至長安會嚴助貴幸薦買臣召見說
春秋言楚詞帝甚說之拜中大夫因言東越
可破之策拜會稽太守擊破東越徵爲主爵
都尉子山拊官至右扶風

後漢沈豐郡人爲郡主簿太守弟五倫母老不
能之官倫每至臘節常懷戀垂泣遣豐迎母
廣陵母見大江畏水不敢渡豐祭神令子孫
對母飲酒因醉卧

臯伯通漢賢者居臯橋梁鴻與孟光偕至吳爲人賃春伯通異之舍之於家

高岱字孔文郡人性聰達輕財貴義所友皆世偉人太守盛憲以爲上計舉孝廉許貢來領郡岱將憲避難求救於陶謙岱憔悴泣血水漿不入口謙感其忠壯有申包胥之義許爲出軍岱還而貢已囚其母吳人皆爲危悚岱徑往見才辭敏捷好自陳謝貢登時出其母孫策聞其善左傳乃自玩讀欲與論講虛已

候焉爲媚嫉者所中策遽囚之知友時人皆露坐爲請策登樓望見數里中填滿惡其收衆心遂遇害

沈友字子正郡人年十一華歆行風俗見而異之因呼曰沈郎可登車語乎友逡巡曰君子講好以禮今仁義陵遲聖道漸壞先生銜命將以裨補先王之教整齊風俗而輕脫威儀猶負薪挾火更益其熾歆慚曰自威靈以來雖多英彥未有幼童若此者弱冠博學善屬

文兼好武事注孫子兵法又辯於口時稱其
筆舌與刀三者皆妙過絕於人孫權以禮聘
之既至極論王霸之畧正色立朝清議峻厲
爲庸臣所譖權亦疑其不爲已用害之年二
十九

陸康字季寧郡人祖父續在獨行傳康漢末爲
廬江太守少篤孝悌勤修操行太守李肅察
孝廉肅後坐事伏誅康斂尸送喪還潁川行
服禮終舉茂才歷三郡太守所在有稱子績

仕吳

謝承後漢書

陸紆字叔盤敏淑有思學守城門校尉子駿

駿字季才淳懿信厚爲邦族所懷官至九江都

尉子遜仕吳

吳書陸氏世頌

吳陸績字公紀漢末廬江太守康之子容貌雄
壯博學多識該覽歷數吳孫權辟爲曹掾以
直道見憚出爲鬱林太守罷歸無裝舟輕不
可越海載石爲重姑蘇陸氏之門有巨石號
鬱林石世保其居績雖有軍事著述不廢作

渾天圖注易釋太元皆傳於世豫知亡日爲
辭以訣自謂有漢志士吳郡陸績幼勤詩書
長玩禮易受命南征罹疾遇厄遭命不幸鳴
呼悲隔卒年三十二長子宏會稽南郡都尉
次子叡長水校尉

陸遜字伯言孫權爲將軍時遜年二十一始仕
幕府歷東西曹代呂蒙爲右部督拒關羽進
克公安南郡進封華亭侯進封婁侯遷大都
督破劉備走曹休積功拜上大將軍輔太子

董督軍國赤烏中代顧雍爲丞相時謂伊尹

隆湯呂尚翼周內外之任遜實兼之遜弟瑁瑁子喜

遜子抗抗子景遜族子凱徹凱子禕

陸瑁字子璋遜之弟好學篤義與英游割少分
甘收導孤弱攝養至長乃別嘉禾中拜選曹
尚書諫疏端切孫權嘉之子嘉仕晉

陸抗字幼節建衡中爲都督諸軍事治樂鄉憂
深慮遠數上疏陳時宜破西陵誅步闡貌無
矜色謙冲如常得將士歡心與晉羊祜推僑

扎之好時以爲華元子反復見於今鳳凰中
拜大司馬荊州牧卒子晏嗣晏及弟景從去
機雲外領抗兵

陸景字士仁澡身好學著書數十篇以尚公主
封毗陵侯

陸凱字敬風遜族子爲將數有功封嘉興侯孫
休時領豫州牧雖統兵衆手不釋書好太從
論演其意以筮輒驗孫皓時爲左丞相乃
心公家義形於色卒年七十一

陸

從

从

字敬宗凱之弟天姿聰

從

良

才通行潔

太子和聞其名待以殊禮坐和下獄楚毒備

至終無他辭出爲交州刺史安南校尉夷人

服其恩信交域肅清就加安南將軍永安元

年徵爲西陵督封都亭侯後轉左虎書丞華

覈表薦

從

从

曰

從

从

天姿聰

從

良

才通行潔

從

良

才通行潔

從

良

昔歷選曹在州十餘年內無粉黛附珠之妾
家無文甲犀象之珍後召爲西陵督封都亭
侯華覈以爲宜股肱王室寵以上司則天工

修而庶績熙矣

從心

卒子式嗣

陸禕孫皓時爲將軍父凱亡入爲太子中庶子右史華覈薦曰禕體質方幹器幹彊固董率之才過於魯肅在戎果毅臨財有節

晉陸機字士衡祖遜父抗已見前條機長七尺聲如鐘天才秀逸文章冠世閉門勤學非禮不動太康末與弟雲俱入洛張華謂伐吳之役利在獲二俊遂延譽薦之成都王穎假機後將軍河北大都督宦人孟玖譖機於穎遇

害葛洪稱機文猶

從立

圃積玉無非夜光五

河吐流泉源如一其洪麗妍瞻英銳漂逸亦

一代之絕所著文章三百餘篇行於世弟雲

眈

陸雲字士龍機之弟六歲能屬文性清正有才理與兄齊名雖文章不及而持論過之號二陸舉賢良時年十六吳平入洛周浚謂爲當今之顏子補浚儀令後百姓圖形配食縣社入爲中書侍郎爲成都王穎所害著文章及

新書三百餘篇

陸耽雲之弟爲平東祭酒亦有清譽與雲同遇害孫惠與朱誕書曰三陸相攜閭朝一旦湮滅國喪雋望悲豈一人其爲州里所痛如此陸喜字恭仲父瑁喜少有聲名好學有才思其爲自敘畧曰感子雲之法言而作言道觀賈子之美才而作訪論觀子政洪範而作古今歷覽蔣子通萬機而作審機讀幽通思從之四愁而作娛賓九思其書近百篇仕吳吏部

尚書入晉爲散騎常侍子育爲尚書郎弋陽

太守姪曄

陸曄字士光喜弟之子父英高平相少有雅望以清正著稱從兄機稱之曰我家世不乏公矣太興初拜侍中與王導等受顧命遺詔錄尚書事謂曄清操公忠歷職顯允事君如父憂國如家歲寒不凋體自門風焉蘇峻之難隨帝在石頭不以凶威變節峻不敢害後求歸鄉里拜墳墓卒諡曰穆子諶散騎常侍弟

玩

陸玩字士瑤器量淹雅弱冠有美名嘗詣王導
食酪因而得疾與導牋曰僕雖吳人幾爲傖
鬼其輕易權貴如此詔曰玩體道清純雅量
洪遠歷位內外風績顯著代王導等爲司空
翼亮累世以洪重爲人主所貴性通雅不以
名位格物誘納後進謙若布衣搢紳皆廢其
德字薨諡曰康子納

陸納字祖言少有清操正厲絕俗歷職恪勤純

固始終不渝自吳興太守召拜尚書將應召
外白宜裝幾船臨發止有被襪而已餘竝封
以還官時會稽王道子少年專政納望闕而
歎曰好家居織兒欲撞壞之邪朝士咸服其
忠亮卒官開府儀同三司

以曩官部會蘇王首千心手專如際望闕而
仗曰宜裝樂岷朝樂山育姪斷而日翁竝桂
固敏絲不命自吳興太守各拜尚書祿勳各

吳郡志卷二十一

吳郡 范成大撰

人物

宋陸子真吳人晉太尉玩之曾孫自玩至子真
父萬載世爲侍中皆有名行子真兄仲元又
爲侍中子慧曉仕齊有大名時人方之金張
二族子真仕宋爲海陵太守時中書舍人秋
當見幸家在郡子真不與相聞聞者高之王
僧達貴公子孫以才傲物爲吳郡太守入閭

門曰彼有人焉顧琛一公兩掾英英門戶陸子真五世內侍我之流亞後爲中散大夫卒陸徽字休猷爲建康令清平無私除平越中郎將士庶愛詠爲益州刺史威惠兼著蜀士安之卒於官家無餘財文帝痛惜之謚曰簡子

梁杲煦仕梁

齊陸慧曉郡人字叔明清介正立不雜交游同郡張緒稱之曰江東裴樂也廬江何點常稱慧曉心如照鏡遇形觸物無不瞭然慧曉與

張融鄰其間有池池上有二楊柳點歎曰此池便是醴泉此木便是交遜沛國劉璡清介士也行至吳謂人曰吾聞張融與慧曉竝宅其間有水此水必有異味命駕往酌飲之曰飲此水則鄙吝之萌盡矣齊武帝爲子廬陵王求天下第一人爲行事乃使慧曉爲長史行事卒官輔國將軍南兖州刺史贈太常三子僚任倅竝有美名時謂之三陸陸閑字遐業慧曉兄子有風槩仕齊揚州別駕

知難將作乃以疾不預州事刺史始安王遙
光作亂尚書令徐孝嗣啓閑不預謀未及報
徐世標害之子厥絳襄襄仕

陸澄字彥深吳人祖邵臨海太守父瑗州從事
澄好學博覽無所不知永明中領國子博士
尚書令王儉自以博聞多識讀書過澄集學
士何憲等盛自商畧澄待儉語畢然後讀所
遺漏數百千條皆儉所未覩儉乃歎服卒官
散騎常侍諡靜子澄當世稱爲碩學多墳籍

人所罕見撰地理書及雜傳死後乃出
陸超之吳郡人爲江州刺史晉安王子懋聞鄱
陽隨郡二王死欲起兵超之曰事成則宗廟
獲安不成猶爲義鬼宣城公鸞遣裴叔業襲
尋陽子懋叅軍于琳之拔刃入齋害子懋琳
之勸超之逃亡超之曰人皆有死此不足懼
吾若逃亡非唯孤晉安之眷亦恐田橫客笑
人端坐俟命超之門生謂殺超之當得賞密
自後斬之頭墜而身不僵王元邈嘉其節厚

加殯斂

陸襄字師卿閑幼子梁昭明太子聞襄美行引與共遊處母嘗卒患醫須三升粟漿時冬月日暮求索無所忽有老父詣門賣漿量如方劑將酬直無何失之時爲孝感所致爲郟陽內史有彭李二家相誣告襄引入內室喻之二人感悔同載而還人歌曰陸君政無怨家鬪旣罷讎共車郡人懷襄德化立碑後爲度支尚書臺城陷還吳舉義迎蕭寧爲盟主爲

賊將吳子仙所敗憂憤卒襄弱冠遭家禍釋服猶若居憂終身蔬食布衣不聽音樂口不言殺害五十年侯景平追封餘干侯又顏氏家訓云襄父閑被害襄終身布衣蔬飯雖薑菜有切割者皆不忍食居家惟以掐摘供厨姪雲公

陸雲公字子龍好學有才思嘗製太伯廟碑累遷中書黃門郎太清初卒張纘與雲公叔襄書曰非唯貴門喪寶有識同悲其爲士流稱

重如此從兄才子亦有才名位至廷尉子瓊仕陳

陸杲字明霞徽孫少好學工書畫舅張融有高名杲風韻舉止頗類之時稱曰無對曰下唯舅與甥梁天監中位御史中丞姪直無所顧望號不畏強禦爲義興太守寬惠爲下所稱卒官特進諡質子杲素信佛法持戒甚精著沙門傳三十卷

陸

從

从

响

杲弟學有思理位太子家令撰晉書未

就又著陸史十五卷陸氏驪泉志一卷竝行於時

陸罩字洞元杲子少篤學多所該覽善屬文仕梁太子中庶子以母老求去公卿以下祖道於征虜亭皇太子賜黃金五十斤時人方之疎廣終光祿卿

陸倕字佐公慧曉幼子少勤學能文嘗借人漢書失五行志四卷暗寫還之畧無遺脫幼爲外祖張岱所異岱常謂諸子曰此兒汝家陽

元也與樂安任昉友暨商芸之徒俱號龍門之游梁武帝雅愛倅才敕撰新漏刻及石闕銘仕至太常卿子瓚瓚早慧十歲通經終於童子奉車郎

陳陸瓊字伯玉雲公子幼聰慧六歲爲五言詩有詞采年八歲於客前覆碁局號曰神童梁武帝召見風神警亮進退詳審帝甚異之侯景亂攜母避地于縣西鄉勤苦讀書遂博學善屬文仕陳累尚書殿中郎諸大手筆竝中

敕付瓊後遷吏部尚書詳練譜牒雅有識監性謙儉不自封殖雖位望日隆而執志愈下室宇不改車服不華祿俸皆散之宗族家無餘財暮年知足避權常謝疾母亡後主自制誌銘朝野榮之瓊哀慕過毀卒有集二十卷陸瑜字幹玉瓊之弟少篤學美詞藻與兄琰同仕陳晉安王府時人比之二應瑜聰敏強記受莊老於汝南周弘正學成實論於僧瑒法師竝通大旨卒贈光祿卿

陸琰字溫玉瓊從父弟父令公梁中軍宣城王
記室叅軍琰幼孤好學有志操仕陳累遷直
嘉德殿學士文帝以琰博學善占誦引置左
右嘗使製刀銘援筆卽成無加點竄使聘齊
年二十餘風氣韶亮占對閑敏齊人傾心焉
卒贈司農卿琰寡嗜慾鮮矜競遊心經籍晏
如也所製文筆多不存本後主求其遺文得
二卷

陸琛字梁玉瓊從父弟臨川王長史丘公之子

少警敏事後母以孝聞陳後主時坐漏泄禁
中語抵罪

陸繕字士繻倕兄子幼有志尚以雅正知名陳
文帝時爲中庶子繕儀表端麗進退閑雅文
帝使太子諸王咸取則焉後拜御史中丞以
父終固辭詔易解宇居之大建中與徐陵等
叅議政事卒諡曰安子子辯慧辯慧字敬仁
年數歲詔入殿內應對進止有父風姪見賢
亦方雅位少府卿卒諡平子

陸子隆字興世郡人祖敞之梁嘉興令父俊封
氏令子隆慷慨有志功名侯景之亂張彪爲
吳郡太守引爲將帥及隋文帝討彪彪將皆
降唯子隆力戰文帝義之使領甲仗宿衛遷
都督荊州刺史綏集夷夏甚得人和吏詣闕
求立碑頌美功績詔許之卒諡威子弟子才
亦有幹畧從子隆征討有功封始興縣子

陸慶郡人少好學通五經尤明左氏春秋節操
甚高仕梁爲婁令陳天嘉中召爲散騎侍郎

不就永陽王爲吳郡太守聞其名欲與相見
辭以疾王微服穿壁觀之曰陸君風神凝峻
殆不可測嚴君平鄭子真何以尚茲慶後築
室屏居以禪誦爲事故傳經受業者鮮焉
陸山才字孔章吳人祖寶梁尚書水部郎父況
中散大夫山才倜儻好尚文史紹泰中歷散
騎常侍遷西陽武昌二太守卒諡簡子

隋陸從典字由儀瓊子幼聰敏年八歲讀沈約
回文研銘援筆擬之便有佳致十二作柳賦

詞甚美篤學業博涉羣書位司徒掾陳亡入
隋爲著作佐郎詔續司馬遷史記迄于隋未
就而卒

陸詡郡人隋文帝時以禮學自命見儒林傳詡少

習崔靈恩之禮入梁時百濟國表求講禮博
士詔令詡行元嘉中爲祠部郎

隋陸搢字士紳吳郡人祖映梁侍中父陟諮議
參軍世有文集搢不墜家聲仁壽中召補春
宮學士大業中爲燕王記室唐正觀中授朝

散大夫魏王府文學大業雜記

唐陸元朗字德明以字行蘇州吳人善名理言

以明經仕隋爲司業入殿中授經王世元僭
號封子從之恕爲漢王以德明爲師卽其廬

行束脩禮德明恥之服巴豆巨劑僵偃壁下

元恕入拜牀前德明對之遺痢不復開口遂
移病去太宗爲秦王辟爲文學館學士以經

授中山王承乾遷國子博士封吳縣男卒論
撰甚多傳於世子訓信麟德中爲左侍極檢

校右相

陸質吳郡人柳宗元撰其墓表云先生與天水
啖助及趙康能光明春秋之學爲春秋集注
二十篇辯疑七篇微指二篇明章大中發露
公器以堯舜爲的文武爲首周公爲翼用是
爲天子爭臣歷尚書郎國子博士給事中皇
太子侍讀永貞年侍東宮明年天子踐祚先
生終矣門人世儒相與諡曰文通先生
陸元方字希仲吳人陳給事黃門侍郎琛之曾

孫舉八科皆中累轉監察御史使嶺外涉海
風濤驚壯元方曰吾受命不私神豈害我趣
使濟而風訖息累遷鸞臺侍郎拜平章事元
方素清謹每進退羣臣武后必先訪問外祕
莫知臨終取奏藁焚之曰吾陰德在人後當
有興者卒贈越州都督子象先景倩景融皆
美才知名

陸象先器識沈邃舉制科高第累授中書侍郎
進同中書門下平章事性恬靜寡欲識論高

簡爲時所推不附太平公主元宗曰歲寒然後知松栢之後凋罷爲益州大都督府長史政尚仁恕卒贈尚書左丞相謚文貞始象先名景初睿宗曰子能紹先德是謂象賢者乃賜名

陸景倩爲扶溝丞按察使覆州縣殿最以景倩爲真清終監察御史

陸景融美姿質寬中而厚外博學工筆扎政有風績遷工部尚書景融於象先後母弟也象

先被笞景融諫不入則自楚母爲損威人多其友

陸東之元方伯父善書名家官太子司議郎陸餘慶元方從父陳衛將軍珣孫方雅有祖風閉戶誦書三年以博學稱舉制策甲科累遷太子右庶子封廣平郡公旣仕好薦藉寒品晚進人有過輒面折退無一言風流敏辨與陳子昂等善時號方外十友武后時雖極貴驟用而戮不反踵餘慶以道自將雖仕不赫

赫訖無悔尤開元初終太子詹事諡曰莊
陸瓌字仲采餘慶子舉明經仕以清幹稱除洛
陽令推勸姦豪人不敢犯不阿時宰數忤貴
近累徙西河太守封平恩縣男屬邑多虎前
守設檻奔瓌至徹之而虎不爲暴

陸長源字泳

舊史作泳之

餘慶孫性剛而贍於學好

談易無威儀而清白自將罷汝州刺史送車
二乘曰吾祖罷魏州有車一乘而圖書半之
吾愧不及先人副董晉爲宣武司馬以峻法

繩騎兵多所裁正軍亂遇害朝廷嗟悵贈左
僕射

陸贄字敬輿蘇州人十八第進士中博學宏辭
調鄭尉以書判拔萃補渭南尉德宗立遣黜
陟使行天下贄說使者請以五術省風俗八
計聽吏治三科登雋又四賦經財實六德保
罷察五要簡官術時皆韙其言遷監察御史
召爲翰林學士遷諫議大夫仍爲學士數言
竇參罪罷學士以兵部侍郎知貢舉參黜乃

以中書侍郎同平章事初贄入翰林年尚少以材幸天子常以輩行呼而不名在奉天朝夕進見帝親倚至解衣衣之雖外有宰相主大議而贄常居中參裁可否時號內相論議數十百篇譏陳時病皆本仁義可爲後世法陸南金字季孫開元初嶺南流人盧崇道逃還僞稱南金弔客突入其舍而道其情南金匿之俄事覺詔御史捕按南金當重法弟趙璧自言匿崇道者我也請死南金固言弟自誣

不情御史怪之趙璧曰母未葬妹未歸兄能辨之我生無益不如死御史驚上狀元宗皆宥之南金知書史履操謹飭張說陸象先以賢謂之終太子洗馬

陸希聲景融四世孫博學善屬文通易春秋老子論著甚多隱義興召爲右拾遺時儉腐秉權歲數歉上言當謹視盜賊明年王仙芝反昭宗聞其名召爲宰相以太子少師罷卒贈左僕射諡曰文

陸賓虞元方六世孫以文名歷侍御史

陸龜蒙字魯望元方七世孫賓虞子舉進士一
不中往從張搏辟後居松江甫里多所論撰
雖幽憂疾痛貲無十日計不少輟有田數十
畝與江通常苦飢躬畚鍤之勤嗜茶置園顧
渚山下歲取租焉不喜與流俗交雖造門不
肯見不乘馬升舟設篷席齋束書茶竈筆牀
釣具往來時謂江湖散人或號天隨子甫里
先生自比涪翁漁父江上文人士後以高士召

不至李蔚盧雋素與善及當國召拜左拾遺
詔下而卒光化中韋莊表龜蒙及孟郊等十

人皆贈右補闕

唐書

龜蒙善爲賦絕妙人有

收得賦林皆綴緝屬對差次比擬凡數首有
題而未就其用工如此

談苑

龜蒙與顏薏皮

日休羅隱吳融爲益友性高潔家貧思祿與
張搏爲吳興廬江二郡倅著吳興實錄四十
卷松陵集十卷笠澤叢書三卷疾終吳融爲
作傳貽史官韋莊撰文陸希聲撰碑文顏薏

書

北夢
瑣言

陸誇自右拾遺除司勳郎中棄官隱吳中詔召之既在道歐陽柎遺書誚其出處之遽誇遂還柎詹從子也名亦高

陸亘字景山吳縣人中舉制科遷太常博士禮史孟真練容典倨橫偃蹇亘榜逐之胥曹失色歷充蔡虢蘇四州刺史浙東觀察使亘文名嚴重所至以善政稱卒贈禮部尚書陸徽之字彥猷常熟人高才博學邑中推爲鄉

先生建中靖國初有詔求直言徽之進對與雍孝聞等力陳時政闕失唱第日皆駁放大觀末彗星見復收拾孝聞等徽之已卒

吳郡志卷二十一

卷二十一 禮儀 古閣

吳郡志卷二十二

人物

吳郡 范成大撰其

顧琛字弘瑋吳縣人和曾孫祖履之父倓竝為
司徒左曹掾琛謹確不浮華孝建初為吳郡
太守以起義功封永新侯三年竟陵王誕反
遣客陸延稔齎書板琛及子弟官琛執其使
斬之遣二子送延稔首啓聞後復為吳郡太
守琛雖貴達吳音不變

顧覲之字偉仁爲山陰令御繁以約畫日垂簾
門階閑寂自宋世爲山陰務簡而事理莫能
尚也後爲吳郡太守幸臣戴法興權傾人主
覲之未嘗低意或嫌其風節過峻覲之曰辛
毗有云孫劉不過使吾不爲三公耳卒官湖
州刺史諡曰簡子覲之常謂命有定分非智
力所移唯應恭已守道信天任運而闇者不
達妄求徼倖徒虧雅道無關得喪乃以其意
命姪愿作定命論焉

顧歡字景怡郡人聰敏好學母亡廬墓次遂隱
遁不仕開館聚徒受業者嘗近百人 太祖
輔政召爲揚州主簿遣中使迎歡及踐跗乃
至歡稱山谷臣顧歡上表曰湯武得勢師道
則祚延秦項忽道任勢則身戮夫天門開闔
自古有之四氣相新絺裘代進今火澤易位
三靈改憲天樹明德對時育物是以窮谷愚
夫敢露蠡管謹刪撰老氏獻治綱一卷伏願
稽古百王不以蒨蕘棄言不以人微廢道臣

自足雲霞不須祿養陛下既遠見尋求敢不盡言言既盡矣請從此退武帝永明元年詔徵爲太學博士同郡顧黯爲散騎郎俱不就

顧黯字長孺有隱操與顧歡俱召俱不赴
顧子喬吳人梁武陵王府叅軍事以儒術知名子烜烜梁臨賀王記室亦以儒術知名

王仕陳

顧憲之字士思覬之孫性尤清直宋元徽中爲建康令爲政甚得人和故都下飲酒淳旨者

輒號爲顧建康言其清且美焉仕齊爲衡陽內史出公祿葬疫死者王夔歎曰顧衡陽之化至矣憲之雖累經宰郡資無儋石及歸環堵不免饑寒梁天監中卒遺令勿設靈筵朔望祥忌權安小牀勿用牲牢設香燈下素饌而已所著文數十篇

顧協字正禮吳人晉司空和六世孫年數歲外從祖光祿大夫張永嘗攜之遊武丘山問欲何戲協曰正欲枕石漱流初舉秀才沈約覽

其策歎曰江左以來未有斯作爲湘東王記
室叅軍有詔舉士湘東王表薦曰協行稱閭
里學兼文義服膺墳素雅量邃遠安貧專靜
奉公抗直年幾六十室無妻子臣言欲於官
人申其屈滯協苦執靜退立志難奪可謂東
南之遺寶昔孔愉表韓續之子庾亮薦翟陽
之德臣雖未齒二臣協實無慙兩士見文苑
英華
累遷常侍卒官無衾以斂武帝爲舉哀諡溫
子協初爲廷尉正冬服單薄寺卿蔡法度欲

解襦與之暉其清嚴不敢發口自丁艱憂終
身布衣蔬食少時將聘舅息女未成昏而協
母亡免喪後不復娶年六十餘此女猶未他
適協義而迎之晚雖判合卒無嗣息博極羣
書撰異姓苑五卷瑣語十卷文集十卷竝行
於世

顧野王字希馮烜子七歲知五經大指九歲能
屬文十歲隨父之建安作建安地記長則徧
觀經史精記默識天文地理著龜占候蟲篆

字無所不通又善丹青時人稱絕侯景之亂歸本郡召募鄉黨隨義軍援都體素清羸裁長六尺又居喪過毀殆不勝哀及伏戈被甲陳君臣之義逆順之理抗辭作色莫不壯之陳天嘉中卒官光祿卿知五禮事野王少以篤學至性知名在物無過辭失色視其容貌似不能言其厲精力行皆人所莫及撰玉篇輿地志符瑞圖顧氏譜傳分野樞要續洞冥記從從去象表又撰通史要畧國史紀傳未就

而卒

顧彪吳人以春秋左氏授朱子奢名于世

顧嗣

從從肩

吳人父覽隋祕書學士

從從肩

永徽中

修國史撰太宗實錄又論次國史有勞封餘杭縣男終司文郎中子琛武后時拜相

顧少連字夷仲吳人擢第補登封主簿邑有虎孽少連命塞陷奔移文嶽神虎不爲害德宗幸奉天徒步詣謁授翰林學士中書舍人閱十年以謹密稱裴延齡方橫無敢忤者少連

酒酣挺笏謂曰段秀實笏擊賊臣今吾笏將
擊姦臣奮且前元友直勸解之改京兆尹東
都留守表禁苑及汝閑田募耕以便民閱武
力利鎧仗號良吏卒封本縣男贈右僕射諡
曰敬始少連攜少子師閔奔行在有詔同止
翰林院車駕還授同州叅軍韋夏卿撰少連
神道碑謂顧氏復徙吳會自晉司空和洎梁
給事中耀至少連十三代矣又云少連父望
慕梁伯鸞於陵仲子安貧履道不辱其身該

通六經高貫百氏究天人之際盡性命之端
觀夏卿所述望蓋耆儒隱君子也又云子師
閔以拔萃甲科次師安等三人非少子也碑
見文苑英華

顧禧字景繁祖沂字歸聖知龔州父彥成字子
英兩浙運使皆有賢名禧雖受世賞不仕居
光福山中閉戶讀誦博極墳典所著書甚富
注蘇文忠公詩尤詳紹興間郡以遺逸薦閑
居五十年不出名重鄉里

顧襄字公甫郡人太學上舍生名聲籍甚熙寧九年登第召爲太學正卒歸葬虎丘戴顓字仲若父逵隱遯有高名顓以父不仕復修其業自桐廬徙居吳吳下士人共爲築室聚石引泉植林開澗少時繁密有若自然乃述莊周大旨著逍遙論禮記中庸篇三吳守將及郡內衣冠要其同遊野澤堪行便去不爲矯介宋國初建辟召竝不就文帝每欲見之嘗謂黃門侍郎張敷曰吾東巡之日當宴

戴公山下也

陳遺郡人宋初爲郡吏母好食鐺底飯遺在役常帶一囊每煮食輒剝其焦以貽母後孫恩亂聚得數斗恒帶自隨及敗逃竄多有餓死遺因此得活母晝夜泣涕目爲失明耳無所聞遺還入戶再拜號咽母豁然卽明南史何求字子有其先廬江人何氏過江自司空充竝葬吳西山爲吳人求除中書郎不拜隱居波若寺足不踰戶人莫見其面宋明帝崩出

奔國哀除永嘉太守求時寄住南澗寺不肯
詣臺乞於寺拜受見許一夕忽乘小船逃歸
吳隱武丘山齊拜太中大夫又不就弟點
杜京產郡人少恬靜閉意榮宦郡命主簿州辟
從事皆稱疾去除奉朝請亦不就永明十年
孔稚珪陸澄虞棕沈約等表薦之曰竊見吳
郡杜京產潔靜爲心謙虛成性通和發於天
挺敏達表於自然學遍從士儒博通史子流
連文藝沉吟道奧奉初之朝掛冠辭世遁捨

家業隱於太平葺宇窮巖採芝幽澗耦耕自
足薪歌有餘確爾不羣淡然寡欲麻衣藿食
二十餘載雖古之志士何以加之謂宜釋巾
幽谷結組登朝則巖谷含歡薜蘿起抃矣不
報建武初徵爲員外散騎侍郎京產曰莊生
持釣豈爲白璧所回辭疾不就

陳景尚吳人善講誦道釋中皆不可及製靈書

經大行於世梁邵陵王甚重之抱朴子

何點字子皙求之弟居喪幾至滅性真素通美

博通羣書善談論無所與屈世以點爲孝隱士弟嗣爲小隱士士大夫多慕從之兄求卒於武丘點菜食不飲酒三年腰帶減半宋齊之間累詔不就嘗患渴累歲不愈後在吳中石佛寺講所晝寢夢一道人形貌非常授丸一掬夢中服之自此而差時人以爲淳德所感弟嗣本名犯太何嗣字子季仕齊爲中書令領臨海巴陵王師拜表解職不待報輒去二兄求點竝棲隱求

先卒至是嗣又隱世號點爲大山嗣爲小山亦曰東山兄弟號何氏三高嗣家世少壽惟祖尚之至七十二嗣年登祖壽以上世皆葬吳西山乃移還吳至吳居武丘山西寺講經論學僧復隨之東境守宰經途者莫不畢至戒殺有虞人逐鹿鹿徑來趨嗣伏而不動又有異鳥如鶴紅色集講堂馴狎如家禽年八十六

孫修道吳人梁中散大夫以雅素知名子瑒仕

陳

皇侃郡人青州刺史皇象九世孫少好學師事
賀瑒精力專門盡通其業尤明三禮孝經論
語仕梁國子助教召入壽光殿說禮記義武
帝善之加員外散騎侍郎侃性至孝日誦孝
經二十徧丁母憂還鄉卒所撰論語禮記義
見重於世

孫瑒字德璉吳人父修道瑒倜儻好謀畧博涉
經史仕梁以軍功封富陽侯陳初王琳立蕭

莊於郢召瑒都督郢州刺史周將乘虛攻之
瑒兵不滿千人乘城拒守遂盡有中流之地
奉表歸陳封襄縣侯召爲領軍將軍文帝謂
曰昔朱買臣願爲本郡卿豈有意乎改吳郡
太守給鼓吹一部改鎮公安爲鄰境所憚累
遷五兵尚書卒諡曰從木瑒事親以孝聞於
諸弟甚篤睦性通泰有財散之親友家庭穿
築極林泉之致歌鍾舞女當世罕儔嘗於山
齋設講肆集從之儒之士冬夏資奉之處已

率易不以各位驕物巧息過人爲起部尚書
軍國器械多所創立後主數幸其宅賦詩述
勲德及卒尚書令江總爲之銘誌後主又題
銘後四十字遣左戶尚書蔡徵就宅宣勅鐫
之畧曰天長路遠歲久靈多功名未勒此意
如何時以爲榮瑒二十子次子訓頗知名仕
至高唐太守

杜之偉郡人陳武帝命以經授衡陽獻王昌
孫超之全景文皆郡人微時嘗與沈攸之共乘

小船出都有人止而相之曰君三人皆當至
方伯不驗便是相書誤耳後超之果爲廣州
刺史景文字弘達齊永明中卒於光祿大夫
潘徽字伯彥郡人性聰敏受禮於鄭灼受毛詩
於施公受書於張冲講莊老於張譏竝通大
義尤精三史善屬文能持論秦孝王俊令徽
於馬上爲賦行一驛而成復令爲萬字文煬
帝時爲京兆郡博士

褚輝字高明郡人以禮學稱於江南煬帝徵天

下儒士集內史省講論輝博辯無能屈者擢
太學博士撰禮疏百卷

徐孝穎吳人祖麟梁侍中石陽侯父樞陳尚書
起部郎孝穎勤學多覽善屬文性至孝丁母
憂三年縗經不離身經冬不御綿纈形體骨
立杖而能起每哭臨哀聲徹於郡邑聞者亦
爲隕涕嘗在園中晝卧見人盜菜徐轉身向
裏恐盜見之其仁行謙退皆此類也仕煬帝

爲學士校書郎

大業雜記

朱子奢吳人從鄉人顧彪授經善文辭正觀初
持節使海外平高麗百濟新羅三國之憾子
奢有儀觀夷人尊畏之累遷諫議大夫唐初
太廟止四室子奢始發七廟之議帝欲觀起
居記錄子奢曰陛下所舉無過事雖見無嫌
然以此開後世史官之禍可懼也史官全身
畏死則悠悠千載尚有聞乎子奢性樂易能
劇談以經誼緣飾每侍宴帝令論難羣臣恩
禮甚篤

史德義崑山人咸寧初隱居武丘山以琴書自適或騎牛帶瓢出入郊郭東市號爲逸人高宗聞其名召赴洛陽尋稱疾歸公卿皆賦詩餞別德義亦以詩留贈其文甚美天授初江南道宣勞使周興表薦則天徵赴都詔曰蘇州隱士史德義志尚虛從從之素履真確謙冲彰於里閭孝友表於閨庭固辭徵辟長往嚴陵之瀨多謝簪裾高蹈愚公之谷風操可知啓沃攸行特宜優獎委以諫曹授諫議大夫

後放歸丘壑

朱佐曰郡人兩登制科三爲御史子承慶年十六登秀才科代濟其美天后嘗吟詩曰白日依山盡黃河入海流欲窮千里目更上一層樓問是誰作李嶠對曰御史朱佐曰詩也賜綵百疋轉侍御史承慶嘗爲昭陵挽詞入高等由是父子齊名翰林盛事

陶峴崑山人文學自許生知八音通曉不謀宦遊富田業擇人不欺者悉付之身泛江湖遍

遊煙水往往數歲不歸製三舟一自載一置
賓客一貯飲饌與客孟彥深孟雲卿焦遂共
載逢佳山水必窮其勝開元末名聞朝廷經
過郡邑靡不招之峴不肯來自謂麋鹿野人
非王公上客亦有不招而自詣者吳越之士
號爲水仙常慕謝康樂之爲人言終當樂死
山水浪迹垂三十年後遊襄陽西塞歸老於
吳

歸崇敬字正禮吳縣人治禮家學多識容典舉

博通墳典科第一詔舉才可宰百里復策
高等大曆初以倉部郎使新羅遇風濤舟幾
壞衆謀易單舸崇敬不肯獨濟風訖息使還
囊橐惟衣服東夷傳其清德遷翰林學士左
散騎常侍餘姚郡公表歸上冢寵賜贈帛儒
先以爲榮卒贈僕射謚曰宣論撰數十篇
歸登字冲之崇敬子事繼母篤孝舉孝廉高第
又策賢良性溫恕嘗慕陸象先爲人正元初
爲右拾遺裴延齡得幸右補闕熊執易疏論

之以示登登動容曰願竄吾名雷霆之下君
難獨處同列有所諫正輒聯名無所回諱轉
起居舍人凡十五年退然遠權勢終不以淹
晚槩懷順宗爲太子登父子侍讀憲宗問政
所先知帝睿而果于斷勸順納諫爭內外傳
爲讜言進工部尚書封長洲縣男諡曰憲
歸融字章之登之子開成初拜御史中丞湖南
觀察使盧周仁取羨錢億萬進京師劾奏請
還所進代貧民租入歷兵部尚書封晉陵郡

公會昌後儒臣少朝廷禮典多本融議

沈旣濟吳人經學該明有良史才召拜史館修
撰議則天皇后進非以德請省其紀位禮部
員外郎

沈傳師字子言旣濟子材行有餘能治春秋工
書有楷法舉進士禮部侍郎權德輿於門生
中推爲顏子復登制科累拜尚書右丞湖南
江西觀察使吏治嚴明吏不敢罔以廉靖聞
入爲吏部侍郎卒贈尚書傳師性夷粹無競

更二鎮十年無書賄入權家初拜官宰相欲以姻私託幕府者傳師拒曰誠爾願罷所授故其僚佐如李景讓蕭寘杜牧極當時選治家不威嚴閨門自化兄弟子姓屬無親疏衣服飲食如一問餉姻家故人帑無儲錢鬻宅以葬

沈詢字誠之傳師子能文辭累遷昭義節度使治上簡易人皆便安卒贈兵部尚書左散騎常侍

徐岱字處仁蘇州人本農家子於學無不通辯論明銳座人常屈終給事中史館修撰

于公異吳人進士擢第李晟表爲書記破朱泚公異爲露布曰臣旣肅清宮禁祇奉寢園鐘簾不移廟貌如故帝覽泣下曰誰爲之辭或以公異對帝咨歎一再然仕不振而卒

丁公著字平子吳人幼喪母七歲見鄰媪抱子哀感不食請於父緒願絕粒學老子道稍長父勉敕就學舉明經授校書郎不滿秩輒去

侍養父喪負土作冢貌力癯憊見者憂其死
孝觀察使表上至行詔刺史存問賜束帛旌
表其閭後爲皇太子諸王侍讀著太子諸王
訓十篇穆宗立未聽政召居禁中條詢治理
且許以相公著陳遜牢切辭疾求外所至以
清靜聞終太常卿公著清約守道每進一官
輒憂見顏間四十喪妻終身不畜妾及卒天
下惜之

吳郡志卷二十二終

風能強多毛晉說也
重刊于虞山汲古閣

吳郡志卷二十三

吳郡 范成大撰

人物

顧雍字元歎吳人曾祖奉潁川太守蔡伯喈嘗
避怨於吳雍從學琴書伯喈歎異之故與伯
喈同名而字元歎從宦有治迹累遷領尚書
令封侯拜侯還寺而家人不知不飲酒寡言
語舉動時當爲孫權所敬憚代孫邵爲相選
用文武各隨能所任心無適莫訪民間及政

職所宜輒密以聞若見納用則歸之於上不
用終不宣泄相十九年卒子裕襲侯

雍弟徽
雍族人

弟雍子邵穆一
名裕邵子譚承

顧徽字子歎雍之弟以才辯為孫權腹心權欲

揣曹操意遷徽輔義都尉以往操具問境內

消息徽應對婉順拜巴東太守欲大用之會

卒

吳書

顧悌字子通雍族人以孝悌廉正聞於鄉黨孫

權時為將軍言辭切直朝廷憚之悌父向歷

四縣今年老致仕每得父書灑掃設几筵舒

書其上拜跪讀之父終飲漿不入口五日以

不見父喪常畫壁作棺柩象設神座於下對

之哭泣服未闋而卒

顧邵字孝則博覽書傳好樂人倫風聲流聞遠

近稱之與舅陸績齊名為郡守舉善以教風

化盛行留心下士雖役伍微賤皆拔而友之

世稱知人

子譚承

顧穆宜都太守

子榮仕晉

顧譚字子默邵之子弱冠爲太子四友清識絕倫獨見推重自謝景羊徽之徒悉在譚下赤烏中爲左節度每省簿書未嘗下籌徒屈指心計盡發疑謬薛綜爲選曹尚書固讓譚曰譚心精體密貫道達微才照人物德允衆望孫權待之甚隆遂平尚書事遭讒徙交州著新言二十篇

顧承字子直譚之弟孫權召見之賜丞相雍書曰貴孫子直令聞休休至與相見過於所聞

爲君嘉之拜吳郡西部都尉出平山越入爲侍中終奮威將軍

顧禺字孟著雍諸孫而榮兄子也少有名望爲散騎侍郎

顧榮字彥先吳人爲南土著姓祖雍父穆榮機

神從

從良

月悟弱冠仕吳吳平與陸機兄弟同入

洛時號三俊陳敏反南渡江榮起兵攻敏敏率萬餘人出榮以羽扇麾之皆潰永嘉初召拜侍中禍難方作輕舟而還元帝鎮江東以

爲軍司謀畫皆諮焉朝野推敬之卒官散騎
常侍安東軍司嘉興伯贈侍中驃騎將軍開
府儀同三司諡曰元榮經德體道謀猷洪遠
忠正之節在困彌厲族弟衆

顧衆字長始父祕交州刺史衆有文武才幹爲

鄱陽太守王

從從
文享

作逆以軍期召衆聲色甚

厲衆不爲動容陸玩曰所謂剛亦不吐柔亦
不茹仲山甫何以加之蘇峻反衆還吳潛圖
義舉吳中人士同時響應與賊戰破之以功

封鄱陽縣伯遷僕射卒諡曰靖弟三子會中
軍諮議叅軍時稱美士族子和

顧和字君孝衆族子曾祖容荊州刺史祖相臨
海太守和總角便有清操族叔榮曰此吾家
騏驎興吾宗者王導謂和珪璋特達機警有
鋒不徒東南之美實爲海內之俊累遷中丞
僕射多所獻納不阿權臣卒官儀同三司諡
曰穆子淳歷黃門侍郎左尉將軍曾孫琛仕
宋

張允吳人輕財重士名顯州郡爲孫權東曹掾子溫字惠恕少修節操容貌奇偉顧雍以爲當今無輩孫權聞之曰如是則張允不死矣召見文辭占對觀者傾竦權改容加禮甚見信重以輔義中郎將使蜀蜀人甚貴其才權嫌其聲名太盛會暨豔譖行遂併幽之駱統表理曰溫弘雅之素英秀之德文章之采論議之辨卓躒冠羣煒曄曜世人未有及之者也若忍威烈宥賢才以純大業固明朝之休光也權終不納溫病卒二弟祗白亦有才名與溫俱廢

張儼字子節吳人弱冠知名博聞多識拜大鴻臚寶鼎初使于晉磨厲鋒鍔息不辱命旣至晉賈充裴秀荀勳等欲傲以所不知皆不能屈羊祜何從元竝結縞帶之好道病卒

張訓字叔方德量淵懿清虛淡泊善文辭爲海昏令甚有惠化

張純字元基少厲操行學博才秀拜郎中爲廣

德令有治異績擢太子輔義都尉又文士傳
曰純少有清才與同郡張儼朱異俱童少往
見驃騎將軍朱據據聞三人才名欲試之曰
今三賢屈顧老鄙相聞渴甚矣其爲吾各賦
一物然後乃坐夫騶裏以迅驟爲功鷹隼以
輕疾爲妙何必積息皆隨目立成據大歡悅
純賦席曰席以冬設簟爲夏施揖遜而坐君
子攸宜儼賦犬曰守則有威出則有獲韓盧
宋鵲書名竹帛異賦弩曰南岳之榦種山之

銅應機命中獲隼高墉

張禕少有孝行恭帝爲琅邪王以爲郎中令及
帝踐祚劉裕以禕帝故吏素所親信封藥酒
一甕付禕使醜王禕旣受命而歎曰鳩君而
求生何面目視息世間哉不如死乃自飲之
卒子暢仕宋

張憑字長宗郡人有志氣爲鄉閭所稱舉孝廉
劉惔見之清言彌日遂言之於簡文帝召與
語歎曰張憑勃率爲理窟官至御史中丞

張澄吳人晉光祿大夫當葬父郭璞為占葬地
曰葬某處年過百歲位至三司而子孫不蕃
某處年減半位止鄉校而子孫貴顯澄乃葬
其劣處位果止光祿年六十四至曾孫裕遂

昌子彭祖

張彭祖廣州刺史子敞侍御史度支尚書巨元
篡位以事忤元敞表獻忠款事從之為吳郡
太守一云為吳國內史子裕仕宋敞子孫至
宋齊之後益昌為吳大家

張翰字季鷹吳人父儼吳大鴻臚翰有清才善
屬文而縱任不拘時人號為江東步兵賀循
赴命入洛經吳闔門於船中彈琴翰初不識
便同載去齊王冏辟為大司馬東曹掾冏時
執權翰謂同郡顧榮曰天下紛紛禍難未已
吾本山林間人無望於時子善以明智自防
榮執其手曰吾亦與子採南山蕨飲三江水
耳翰因見秋風起乃思吳中菰菜蓴羹鱸魚
膾曰人生貴得適志何能羈官數千里以要

名爵乎遂命駕歸著首丘賦俄而問敗人皆謂之見機翰任心自適不求當世或謂曰卿縱適一時獨不爲身後名耶答曰使我有身後名不如卽時一杯酒人貴其曠達性至孝遭母憂哀毀過禮年五十七卒

沈珩字仲山郡人少綜經藝長春秋內外傳有智謀能專對孫權使使魏文帝引珩談語終日隨事響應無所屈還吳以奉使有稱封永

安鄉侯官至少府

吳書弟峻

沈峻字敬山有名譽而性儉吝張溫使蜀與峻別峻入內良久出語溫曰向擇一端布欲以送卿而無麤者溫嘉其無隱又常經太湖岸上使從者取鹽水已而恨多勅令還減之尋亦自愧曰此吾天性也

笑林

朱據字子範吳人有姿貌膂力又能論難才兼文武孫權以爲可繼呂蒙張溫使領兵屯尚公主拜左將軍封雲陽侯謙虛接士輕財好施祿賜雖豐常不足用遭二宮交惡據擁護

太子義形於色以死守之遂左遷終於新都
郡丞孫亮時二子熊損各復領兵熊子宣襲
爵尚公主至驃騎將軍

朱

從木

字休穆郡人討平山賊有功遷濡須督

拒魏曹仁衆寡不敵亘謂諸將曰勝負在將
不在衆寡諸君聞曹仁用兵行師孰與亘邪
雖曹丕自來尚不足憂部兵進擊仁敗走拜
前將軍封侯亘輕財貴義性彊識與人一面
數十年不忘部曲萬口妻子盡識之愛養吏

士瞻護六親俸祿產業皆與共分其沒也吏
士男女無不號慕家無餘財官周其喪事子
異

朱異字季文以父任除郎累遷至鎮南將軍大
破魏軍後假節爲大都督救壽春圍不解還
軍爲孫琳所枉害

卜靜字

從從

風與顧邵陸通張訓等齊名終剡

令

暨豔字子休郡人張溫引爲選曹尚書性狷厲

好爲清議是時郎曹混淆多非其人豔臧否
區別賢愚異貫遂爲浸潤所譖

韋曜字弘嗣郡人少好學能屬文孫亮時爲太
史令孫皓時遷中書僕射皓欲爲父和作紀
曜執以和不登帝位宜名爲傳由此漸怒皓
酒後以嘲弄公卿爲歡曜但言論經議爲不
承詔收曜付獄徙其家零陵

徐原字德淵慷慨有才志忠壯好直言爲呂岱
所薦爲侍御史岱有得失原輒諫諍原死岱
哭之甚哀曰德淵岱之益友今不幸岱復於
何聞過談者美之

孫拯郡人爲陸機司馬孟超直入機麾下奪囚
拯勸機殺之不能用及機爲成都王穎所害
又收其弟雲龍及拯皆下獄考掠拯兩踝骨
見終不變辭吏民知拯義烈謂曰二陸之枉
誰不知之君可不愛身乎拯仰天歎曰陸君
兄弟世之奇才吾衆知愛今旣不能救其死
忍復從而誣之乎遂同被害拯門人費慈宰

意詣獄明拯冤拯譬遣之曰吾義不負二陸
死自吾分卿何爲爾二人曰君旣不負二陸
僕又安可負君亦被害

吾彥字士則吳人有文武才幹身長八尺手格
猛獸膂力絕羣陸抗奇其勇畧用爲建平太
守時王濬將伐吳造船於蜀彥覺之輒爲鐵
瑣橫斷江路晉師攻之不能剋乃退舍禮之
吳亡始歸晉爲交州刺史二十餘年清身率
下威恩宣著南州寧靖入爲大長秋

蔡洪字叔開郡人有才名時王政陵遲官才失
實君子多退而窮處洪作孤奮論與王沉釋
時論同意讀者莫不歎息仕爲松滋令
朱誕郡人陳敏之亂豪桀多見維繫惟誕與顧
循不豫其事

吳震郡人學行清修老而未調華譚薦之爲著
作佐郎

范平郡人其先銍侯馥避王莽亂適吳因家焉
平研覽墳素該通百氏詔謚文貞先生三子

爽咸泉竝以儒學至大官泉子蔚家世好學
關內侯蔚子文才亦知名

吳郡志卷二十三

終

同前後多半晉書
重刊于虞山汲古閣

吳郡志卷二十四

吳郡范成大撰

人物

張裕字茂度敞之子爲廣州刺史綏靜百越嶺
外安之解職還家徵爲都官固辭以疾就加
金章紫綬茂度內足於財自絕人事經始本
縣之華山爲居止優遊野澤如此者七年爲
會稽太守有吏能職事甚理卒於官守諡曰
恭子子演位太子中舍人弟鏡永辯岱俱知

名時謂張氏五龍

張鏡裕之次子少與顏延之鄰居延之常談義飲酒喧呼鏡靜默無言聲後鏡與客談延之從籬邊聞之取胡牀坐聽辭義清深延之心服謂客曰彼有人焉由是不復酣叫仕至新安太守

張永字景雲裕之第三子涉獵書史能爲文章善隸書騎射雜藝觸類兼善又有巧思大爲文帝所知紙墨皆自營造上每得永表啟輒

執玩咨嗟自歎供御者不及授揚威將軍都督諸將經略河南後爲青冀二州刺史統諸將討薛安都封孝昌縣侯改吳郡太守遷南兗州刺史加都督永少便驅馳志在宣力其爲將帥能與士卒同甘苦年雖老志氣不衰子瓌仕齊

張岱字景山裕之幼子仕爲東遷令殷冲爲吳興太守謂人曰張東遷棲遲下邑名器方顯終當大至歷臨海豫章晉安三王府諮議自

謂一心可以事百君我爲政端平待物以禮
悔吝之事無由而及徙益州刺史益土安其
政齊建元初爲吳郡太守高帝知岱歷任清
直至郡未幾手敕曰大郡任重未欲回換但
總戎務殷宜須望實今用卿爲護軍加給事
中岱拜竟詔以家爲府武帝卽位復爲吳興
太守更以寬恕著名遷南兖州刺史未拜卒
諡貞

張邵字茂宗裕之弟初爲晉琅邪內史王誕龍

驤府功曹

從木從立
從亘從厶

徙誕於廣州親故咸離

棄之唯邵情禮彌謹流涕追送時寇亂年飢
又資饋其妻子武帝以邵勤練憂公補州主
簿邵悉心政事精力絕人帝受命以佐命功
封臨沮伯卒諡曰簡遺命祭以菜果葦席爲
輜車諸子從焉子敷

張敷字景胤生而母亡年數歲問之便有感慕
之色求母遺物唯得一扇緘錄之每感思輒
開筍流涕性整肅風韻甚高好讀

從厶書兼

屬文論少有盛名帝見而愛之與高士宗少
文談繫象少文曰吾道東矣於是名價日重
宋武帝召見奇之曰真千里駒也仕至黃門
侍郎後軍司徒左長史父亡十餘日始進水
漿葬畢不進鹽菜毀瘠成疾未朞而卒孝武
旌其孝追贈侍中名其所居曰孝張里

張暢字少微禕之子少與從兄敷演鏡齊名爲
後進之秀元嘉中累遷安北長史魏太武南
侵至彭城暢於城上與魏尚書李孝伯語吐

屬如流音韻詳雅風儀華潤魏人相視歎息
改爲南譙王義宣長史元凶弒逆義宣舉兵
暢哀容俯仰蔭映當時見者皆願爲盡命事
平封夷道縣侯義宣有異圖暢遣門生荀僧
寶下都因顏竣陳義興釁狀義宣敗暢見原
轉侍中會稽太守卒諡曰宣

張緒字思曼演之子少知名清簡寡欲從伯敷
及叔父鏡並貴異之鏡語人曰此兒今之樂
廣也謝敷云是我輩人宋明帝每見緒輒歎

其清談袁粲謂有正始遺風出爲吳郡太守
齊建元初爲中書令素望甚重大祖深加敬
異王儉嘗云北士中覓張緒過江未有人不
知陳仲弓黃叔度能過否長於易言精理奧
見宗一時吐納風流聽者皆忘飢疲見者肅
然如在宗廟雖終日與居莫能測焉益州獻
蜀桺狀若絲縷武帝植之靈和殿前賞玩咨
嗟曰此楊桺風流可愛似張緒當年時每朝
見世祖目送之謂王儉曰緒以位尊我我以

德貴緒其見賞如此緒口不言利有財輒散
之清言端坐或竟日無食門生見緒飢爲之
辦飧然未嘗求也死之日無宅以殯遺命作
蘆葭輜車引柩上置杯水香火不設祭焉諡
簡子子充仕齊

張瓌字逸祖永之子仕宋不欲前兄瑋處祿免
官不拜遭永喪還吳昇明元年劉秉有異圖
弟遐爲吳郡潛相影響齊高帝密令瓌取遐
諸張世有豪氣瓌與叔恕領兵十八人入郡

斬之郡內莫敢動者

告張沖曰瓌以百

口一擲出手得盧

授吳郡守錫以嘉名

封義成縣侯郡人顧暘陸閑少年未知名瓌引爲綱紀後並立名皆以爲知人瓌以既有國秩不取郡俸高帝敕上庫別藏其俸以表其清鬱林之廢朝臣參承明帝瓌託脚疾不至見朝廷多難屢啟還吳梁天監中卒弟稷子率並仕梁

張沖字思約敷弟柬之子母戴顯女有儀範張

氏內取則焉沖少有至性仕齊爲青冀二州刺史沖父初卒遺命曰祭我必以鄉土所產無用牲物沖在鎮四時還吳取果菜流涕薦焉後遷郢州封定襄侯梁武帝起兵手書喻意又遣辯士說之沖確然不回明年梁兵圍之沖固守不出病將死屬府僚以誠節言終而卒贈散騎常侍護軍將軍

張融字思光暢之子弱冠有名神明俊出機辯如流道士同郡陸脩靜以白鷺羽塵尾扇遺

之曰此旣異物以奉異人仕宋爲封溪令路
經嶂嶮獠賊執融將殺食之融神色不動方
作洛生詠賊異之而不害也融風止詭越見
者驚異聚觀齊高帝素愛融常笑曰此人不
可無一不可有二善草書常自美其能帝曰
卿書有骨力但恨無二王法答曰非恨臣無
二王法亦恨二王無臣法義宣之亂官軍欲
殺融父暢張興世以袍覆暢而坐之得免興
世卒融著高履負土成墳興世子欣時坐罪

當死融又啟竟陵王欲代欣時死王義之建
武中病卒遺令建白旒無旒不設祭三千買
棺無製新衾有玉海集行于世張氏前有敷
演鏡暢後有充融卷稷弟寶積

張寶積何點謂爲保家之主永元中乘腰輿謁
蕭穎胄舉動自若穎胄問何至之晚答曰自
本朝危亂四海橫流旣不能爲比干之死實
未忍爲微子之去是以至晚穎胄深善之後
仕御史中丞

梁張稷字公喬瓌之弟幼有至性所生母喪常設神坐出告反面如事生州里謂之淳孝父母沒廬墓六年性疎率明悟有才略仕齊衛尉卿東昏之難爲梁武佐命然常愧之徐道角作亂見害奉祿皆頒親故家無餘財與族兄充融卷並知名時號四張子嵯姪率率弟盾

張卷字令遠稷族兄少以和理著稱能清言仕至都官尚書

張嵯字四山稷子少篤孝年三十餘猶斑衣受稷杖方雅有志操能清言感家禍終身蔬食布衣不執刀刃不聽音樂仕梁湘東王長史王爲之筮得節卦謂嵯曰卿後當東入爲郡恐不得終其天年嵯曰貴得其所耳爲吳興太守侯景圍建鄴遣弟伊率兵赴援賊將劉神茂遣使說嵯嵯斬其使景遣侯子鑿擊嵯嵯軍敗釋戎服坐聽事賊臨以刃不屈執送景將舍之嵯曰速死爲幸與子孫同遇害者

十餘人景欲存其一子崦曰吾一門已在鬼錄不就爾處求恩於是皆死元帝追贈開府儀同三司諡忠貞子弟畢亦知名

張率字士簡瓌之子性寬雅十二能屬文每日限爲文一篇至年十六凡作二千餘篇陸少

從

女

家從有書萬卷率盡讀之齊建武中舉秀

才沈約目爲南金梁武帝時爲文德待詔帝見其文曰相如工而不敏枚臯速而不工卿可謂兼二子之全矣又謂曰卿東南物望名

家奇才若復以禮律爲意便是宰相才祕書丞天下清官東南望胄未有爲之者今以相處爲卿定名譽尋以爲祕書丞出爲新安太守率嗜酒於家務尤忘懷自少屬文七略及藝文志所載詩賦今亡其文者並補作之所著文衡十五卷文集四十卷行於世

張盾字士宣率之弟以謹重稱爲湘東王記室出監富陽令廓然獨處無所用心身死之日家無遺財唯有文集并書千餘卷酒米數甕

而已

張種字士苗永從孫祖辯宋大司農父略太子中庶子種少恬靜居處雅正傍無造請時人語曰宋稱敷演梁則卷充清虛學尚種有其風仕梁始豐令母卒毀瘠過甚又迫凶荒未葬服雖畢居家飲食常若在喪景平初王僧辯以聞起爲中從事并爲具葬禮葬訖方卽吉陳武帝受禪累遷中書令種沈深虛靜識量宏博時以爲宰相之器卒贈特進諡元子

種雖歷顯位家產屢空終日晏然不以爲病張稜仕梁種之弟清靜有識度位司徒左長史光祿大夫

張充字延符緒之子少好逸遊嘗臂鷹牽狗吳西郭中年三十便脩改多所該通尤明老易能清言與從叔稷俱有令譽仕齊歷尚書殿中郎王儉用事方聚親賓充縠巾葛帔至便求酒言論放逸一坐盡傾遷義興太守爲政清淨入爲侍中梁武帝兵至建鄴東昏遇禍

百官集西鍾下召充充不至歷梁吏部尚書
居選以平允稱遷尚書僕射頃之爲吳郡太
守卒諡穆子

張繹字士和郡人學道講經理致深密詞端華
辯當時所宗梁武帝雅相欽賞時陶隱居著
法檢論明釋老二教繹往復討論甚有條理
隱居嘉焉專心道法居貧守約善八體書別
製雲篆作茅山南洞碑甚工

太平經

張昭字德明弟乾字元明吳人昭幼至孝父爨

病消渴嗜鮮魚昭結網捕魚以供弟乾聰敏
好學亦有至性父卒兄弟並不衣綿不食鹽
醋日食一升麥屑粥每感動必歐血父服未
終母陸氏又卒兄弟毀瘠骨立家貧未得大
葬布衣蔬食十有餘年衡陽王伯信臨郡舉
乾孝廉固辭兄弟因毀成疾昭一目失明乾
亦中冷苦癖年未五十並終于家嗣息俱絕
張仲字叔從從郡人仕陳左中郎將好覃思經
典撰春秋義略喪服孝經論語義前漢音義

官至漢王侍讀

張後

從亂

字嗣宗崑山人祖僧紹梁零陵太守

父冲陳國子博士入隋爲漢王諒并州博士

後

從亂

以學行禪其家以經授太宗封新野

縣公終散騎常侍諡曰康

張承休後嗣孫張說撰其墓志云後嗣之子小

師小師生承休承休希言篤行去華崇實非

法不由非禮不動精於理物敏於從政歷朝

議大夫上柱國

從亂

州刺史說之文曰昌門

一分暉我諸侯蓋居昌門云

張鎰字季權後嗣五世孫父齊丘朔方節度使

東都畱守諡貞獻鎰累殿中侍御史將救盧

樅死白其母曰樅免而鎰貶默則負官貶則

爲太夫人憂母曰兒無累於道吾所安遂執

正其罪坐貶撫州司戶建中二年拜中書侍

郎平章事盧杞忌鎰剛直擠之出爲鳳翔隴

右節度使帝幸奉天鎰罄家貲將自獻行在

營將李楚琳嘗事朱泚夜率其黨作亂遂遇

害史臣曰鎡暴忠王室爲賊姦所乘以歿其身蓋福善禍淫之訓有時而撓要躬可殞而名與岱崧等矣

張從師郡人張說撰其墓志云河南府法曹參軍有唐逸士吳郡張從師冲和純粹辯博閎達卓犖好古儻蕩逸群秀才高第歷官五政忘懷樂道如浮雲無心野鶴獨立上元二年終葬虎丘西原子惟儉惟靜弱歲皆精左氏穀梁春秋第從申時爲祕書省正字從師祖

損之隋侍御史水部郎損之生泐碩學麗藻名動京師從師之父也從申自有時名書法甚高

張旭吳人草書嗜酒每大醉呼叫狂走乃下筆或以頭濡墨而書旣醒自視以爲神不可復得也世呼張顛初仕爲常熟尉有老人陳牒求判宿昔又來旭怒其煩老人曰觀公筆蹟奇妙欲以藏家爾旭因問所藏盡出其父書旭視之天下奇筆也自是盡其法後人論書

歐虞褚陸皆有異論至旭無非短者傳其法
惟崔邈顏真卿文宗時詔以李白歌詩裴旻
劍舞張旭草書爲三絕

張僅字幾道與里人顧崇字叔思皆客於王荆
公公作三經義二人與焉僅至著作佐郎卒
方子通作挽詩極哀楚誦者爲出涕吳人因

目子通爲方挽詩

吳郡聲名顧與張龍門當
日共升堂青衫始見登華

省丹旄俄聞入故鄉含淚孤兒生面垢斷腸慈
母滿頭霜可憐卜載人間事不及南柯一夢長

吳郡志卷二十四

終

風嚴後季毛晉訂正
重刊于虞山汲古閣

吳郡志卷二十五

吳郡 范成大 撰

人物

楊收字藏之父遺直客死姑蘇收七歲而孤遂
居吳處喪若成人母長孫親授經十三通大
義善屬文所賦輒就吳人號神童里人多造
門觀賦詩至壓敗其藩懿宗時以中書侍郎
同中書門下平章事子鉅散騎常侍鱗戶部
尚書

徐修矩吳人仕爲恩王府記室參軍奕世才賢承家介潔守世書萬卷優游自適有潮田五萬步草屋十數間不復出仕皮日休嘗就借書讀之與任晦同時日休與陸龜蒙作二游詩謂修矩與任晦也

任晦吳人仕爲涇縣尉退居里中有深林曲沼危亭幽砌池中又爲島嶼脩篁嘉木掩映隍奧晦資高放寡合好奇樂異喜文學名理之士得顧辟疆舊圃以居云

松陵集

孫發吳人舉百篇科皮日休贈以詩云百篇空體喧金屋一日官銜下玉除陸龜蒙亦云直應天授與詩情百詠惟消一日成其見推當時如此後未有繼之者

皮光業字文通父日休爲蘇州從事光業生於蘇十歲能屬文錢武肅王鏐辟以爲屬吳越國建以爲相教令儀注多其所定美容儀善談論若神仙中人

吳越備史

殷宅字昌從少負志氣博學善屬文弱冠遊太

學籍甚公卿間天寶末知天下將亂乃趣裝東歸侍母居吳郡吳中士大夫得從之遊者鄉黨以爲榮採訪使李希言辟爲從事奏授試崑山尉不就子侑遂顯宦

馮宿集

吳仁璧大順中及第喜屬文精星學及黃白術初學於廬山道士數年其師曰能罷卷學仙乎仁璧固陳求名之志道士曰一第取之拾芥耳但它年從宦勿干英雄仁璧旣成名錢武肅王待以客禮訪以天文固辭非所知欲辟幕職又以詩辭及秦國夫人薨武肅具禮幣請爲志又不從遂爲錢氏所害其女亦善星學仁璧被繫女仰瞻而泣曰文星失位大人其不免乎

備史遺事

溫訥蘇州人吳武忠王楊行密時爲大將劉威幕客行密卒威爲帥府所忌或譖之於徐溫溫將害之訥說威曰公受謗雖深本無狀若輕舟入覲則嫌疑皆亡矣威從之溫果待威甚恭威得遠鎮訥之力也

司馬福郡人始隸吳越王水軍淮人圍姑蘇置
柵環城內外阻絕王遣救兵至莫知城中音
問福能水中行總帥因遣入城淮人設網縣
銅鈴鐵鱗過之必覺福以巨竹觸網淮人聞
鈴聲亟舉網網舉而得度或浮水上則戴萍
苻而行因得入城既而復出凡在水中三日
及救兵與城中弓矢相應淮人以為神軍中
皆服福奇才進官都指揮使吳越王城吳江
置軍鎮命福主之許老於職至國初不絕

備史

遺事

丁偃蘇州進士試邇英延講藝詩云白虎前芳
掩金華舊事輕天心非不寤垂意在蒼生有
古詩諷諫之體偃是歲奏名甚高御前下

第自是二十年始及第

濫公詩話

鄭夷甫郡人少登科有美才嘉祐中監高郵軍
稅遇一術士能推人死期無不驗推夷甫命
不過三十五歲感歎叵堪人有勸其讀老莊
以自廣久之潤州金山一僧端坐與人談笑

間化去夷甫聞之喟然歎息既不得壽得如此僧復何憾哉乃從佛者授楞嚴經往還吳中歲餘忽有所見曰生死之理我知之矣遂釋然放懷無復芥蒂後調封州判官預知死日先期旬日作書與交遊親戚訣及次敘家事備盡至期沐浴更衣公舍外有小園面溪一亭夷甫至其間親督人洒掃及焚香揮手指畫之間屹然立化家人奔出呼已僵立亭亭如植木一手猶作指畫之狀郡守而下少

時皆至士民觀者如堵牆明日乃斂高郵崔

伯易爲墓誌略敘其事

墨客揮犀筆談

謝濤字濟之淳化三年進士幼奇敏講學陽山澄照寺吳令羅處約長洲令王禹偁皆與定交處約謂禹偁曰濟之揚摧天人吾曹敵也由此聲名益顯真宗卽位銳意人物內出濤等二十四人治狀會京東強寇起召知曹州歷三司判官兩浙轉運使侍御史直昭文館知越州權西京留司御史臺就拜祕書監

朝廷嘉其恬退擢太子賓客其爲侍御史清
靜端介百辟望其風采及分務悉屏去外累
不復親筆硯曰佚我以老日閱舊史一卷以
代賓話弟炎有文名與盧植齊名時謂之盧
謝

謝絳字希深濤子祥符八年進士召試館閣校
勘上疏言國家當以土德王天下又言真
宗當配上帝議不合河決滑州又言災異衆
多宜深自引咎損膳于朝罷不急之役省無

名之斂以休息天下又請罷內降詔令皆由
中書樞密院而後施行因進聖治五箴遷知
制誥出知鄧州卒子景初景溫景平景回

龔識給事中真

正字犯廟諱嫌名

孝

儀之子端拱元年

進士大中祥符間翰林學士李宗諤薦擢監
察御史遷殿中侍御史兼左巡使本朝龔
唐製御史不專言職至是始擇學術醇正操
履端方可綱紀朝廷者俾入臺言事識始被
選後以目疾求退除檢校司封郎中平江軍

節度使 本朝吳士登科者始於識今府學先達題名以識爲首識之後有宗元等列於後其家至今居崑山黃姑猶藏其登第時金花榜貼乃用塗金黃紙闊三寸長四寸許大書姓名下有兩知舉花押又用白紙作大帖如藥貼狀貯金花貼於中外亦書姓名二字蓋以此報其人也自唐以榜帖相傳而世少見其制故附於此

丁謂字謂之長洲人少與孫何善袖文謁王禹偁大驚重之以爲自唐韓愈柳宗元後二百年始有此作世謂之孫丁淳化三年進士甲科累遷夔州路轉運使蠻酋爲寇謂諭以禍福蠻感泣作誓刻石立境上五年不得代詔舉自代者乃入爲三司鹽鐵副使大中祥符五年參知政事九年請外爲平江軍節度使知昇州天禧初復參政改樞密使代寇準拜中書門下平章事加司空晉國公 仁宗卽位進司徒侍中爲山陵使授太子少保分司

西京又貶岷州司戶參軍在岷五年累徙光州授祕書監致仕卒年七十二謂機敏有智謀文字累數千百言經覽輒誦善談笑爲詩至圖画博奕音律無不洞曉嘗建鄉郡節鉞以至宰相國朝吳人至相位者始於謂又嘗爲鄉里請於朝特免丁錢鄉人至今德之祠於萬壽寺

許洞字洞天吳縣人父仲容太子洗馬洞疎雋幼習弓矢擊刺長折節勵學精左氏傳咸平

三年第進士爲雄武軍推官詣府白事有倅踞坐不起卽移書責知州馬知節知節怒劾之除名歸吳所居常植一竹以表特操吳人至今詠之曰許洞門前一竿竹日以酣飲嘗從民坊貰酒大有所負一日忽書壁作酒歌數百言人爭往觀其酤數倍景德中獻所撰虎鈴經應籌策科報罷封太山祀汾陰獻三大禮賦卒於烏江主簿

劉少逸年十一文辭精敏有老成體其師潘閔

攜以見長洲令王元之吳縣令羅思純以所作贊二令二令名重當時疑所贊假手未之信因試之與之聯句略不淹思思純曰無風燈焰直少逸曰有月竹陰寒元之曰一回潛渴思吞海少逸曰幾度詩狂欲上天凡數十聯皆敏妙二公驚異聞于朝賜進士及第官止尚書員外郎

續歸田錄

祝庶幾郡人通象緯之學累赴鄉舉不中第景德中求試所習以爲司天靈臺郎

徐祐字受天擢第爲吏以清白稱慶曆中屏居吳下日涉園廬以自適終左官員外郎年七十五

鄭戩字天休吳人居臯橋九歲而孤長客京師師事楊億天聖三年進士第三累歷龍圖閣學士知開封府戩強敏善聽決假貸細民繩治豪宗大姓流姦吏馮士元于海島執政盛度程琳皆坐黜朝議畏其皦核康定元年同知樞密院出知杭州發丁數萬開闢西湖民

賴之歷陝西四路都總管經略安撫招討使
行邊至鎮戎軍天寒與將佐置酒會塞塵起
有報西戎至戢云此必川兵按邊回耳非賊
騎已而果然以資政殿大學士知并州時契
丹與元昊交惡邊奏互上獨戢不以聞上問
戢對戎狄相攻中國不足憂 仁宗嘗曰戢
氣質英豪朕欲爲相故屢試於外尋爲宣徽
北使院檢校太保奉國軍節度使卒年六十
三贈太尉諡文肅

吳感字應之以文詞知名天聖二年省試第一
九年中書判拔萃科仕至殿中丞子純文行
亦高鄉人目曰吳先生

元絳字厚之居帶城橋天聖五年進士屢典大
藩以文章政譽名一時 神宗欲選翰苑之
才王荆公曰有真翰林學士恐不能用爾遂
自外召入翰林未幾參知政事事詳在國史
後以太子少保致仕還吳中與程公闢諸公
爲九老會鄉人號其居曰裘繡坊卒年七十

餘有玉堂集三十卷

程師孟字公闢郡人其高祖思爲錢氏營田使遂居吳師孟居南國側號畫錦坊景祐元年舉進士累遷判三班院給事中判將作都水監歷知楚遂洪福廣越青州爲政簡而嚴剽煩制劇才刃有餘罪非死者不以屬有司獄每爲空寬猛得中所至人悅性樂易純質言無隱情喜爲詩効白樂天而尤簡直至老不改吳語累官光祿大夫致仕年七十八樂圃

朱先生伯原少許可言師孟爲政則曰雖韋丹治豫章孔戣帥嶺南常袞化七閩無以加也天下以爲才卿吏師米芾亦云廣平公以文學登科以政事躋顯以言語出疆以恬退告老足之所及功利蔚起云有詩集二十卷奏議十五卷

盧秉父革本德清人舉神童慶曆之後累歷監司有聲請郡自效神宗嘉其恬退未幾告老累進太子賓客官制行累改通議大夫退

居於吳年八十二今盧提刑橋因其宅以名其家遂爲吳人秉皇祐元年進士元豐中爲發運使父革退老於吳秉每歲上計必請還鄉省侍後帥涇原懇辭歸養手詔慰勉時以爲榮

龔宗元字會之慎儀之孫幼穎悟絕人讀書虎丘爲鄉貢首選天聖五年擢第范文正公謂之曰君器業清修它日必爲令器謹勿因人以進宗元後登朝未嘗遊公卿門文正之教

也終都官員外郎宗元始以都官分司南京謝事取白居易詩作中隱堂語在園亭條子程孫況皆繼登科

龔程字信民剛正自守不怵於禍福力學排異端家不設佛老像祭祀不焚紙錢讀書南峰攻苦食淡遂博極群書鄉人號有脚書廚熙寧六年第進士終桐廬令子況

龔況字濬之崇寧五年進士入館以學術文章與蘇過在朝俱知名時號龔蘇用宗元中隱

故事自號起隱子終祠部員外郎有起隱集三十卷

孫載字積中崑山人曾祖漢英仕錢氏爲蘇州崑山鎮防遏使遂爲縣人載治平二年第進士歷廣東河北淮西使者知海沂婺亳州治務大體時號循吏以嘗薦元祐黨人遂丐歸一日徧謁先壠及嘗與往來者呼妻子與訣問日早晏盥手焚香而逝年七十五

丁隲吳人元祐中嘗爲左言五上章論何正臣

治獄殘酷巧詆刻深甚於羅織黨錮事載國史

侍其沔字國紀上世自高密徙吳學貫穿經傳與人交如淡薄遇其急奮義以往不避艱險五舉禮部退爲鄉先生治平三年沒門人弟子相與議其治行謚曰夷晦先生滕元發志其墓云士生斯世有進取出力得時行道功烈被於民者有行義修潔退而講學爲一鄉之善士者斯二者用捨不同要皆天下之強

立君子也善士蓋指沔其慕尚之如此

秦希甫字辨之郡人元豐二年進士元符中爲陝西轉運判官奏王瞻王厚取邈川青唐府庫物因此致變又言河州至湟州道路險阨往者如赴死所湟州本溫溪心故地當求溫氏之後立爲屏輔皆在可棄崇寧初黨論起言者以棄地爲罪降官入黨籍

葉清臣字道卿長洲人父參嘗守郡謝事因居

天慶觀之東有賢德名

事具七檜堂條下

清臣天聖

二年舉進士第二簽書蘇州觀察判官累遷修起居注三班鹽鐵院上疏論地震熒惑犯南斗因訟范仲淹余靖以言事被黜天下齮舌行將二年人主當深自咎責詳延忠直敢言之士出爲兩浙運使豪右田據上游水不得泄民不敢爭清臣請疏盤龍匯滬瀆港入于海民賴其利擢三司使編前後詔勅使吏不敢欺遷歷翰林侍讀學士歷江寧邠澶青永興河陽諸郡清臣幼敏異好學善屬文天

資爽邁遇事敢行數上書論天下事其陳九
議十要五利皆當世可行者有文集一百六
十卷

錢象先字資元郡人中進士高第宰相呂夷簡
薦其經行爲國子監直講歷大理少卿三司
判官河北江東轉運使天章閣待制龍圖閣
直學士官尚書刑部侍郎又歷知河中河南
府許潁陳蔡亳州以吏部侍郎致仕象先長
於經術 仁宗留神經菽象先以古學進勉

間有顧問依經以對因以諷論政事時務有
啟迪獻納之益留侍經筵前後十五年又通
刑名之學所尚詳平又以犯敕者重犯令者
輕請移敕文入于令者甚衆又省去許捕之
條百餘其持法近厚如此修敕成例賜勲爵
獨賜三品服 仁宗謂輔臣曰象先以孝聞
有母八十歲以此慰其母心熙寧九年卒年
八十一

滕甫字元發避高魯王諱以字爲名更字達道

本東陽人范文正公父之甥教以爲文文正
爲郡安定胡先生翼之亦居郡中甫來從學
廷試兩爲第三孫沔一見曰後當爲賢將累
遷御史中丞翰林學士歷開封真定府鄆許
秦定青揚鄧等州終龍圖閣學士謚章敏甫
慷慨豪邁不拘小節近世名將無及者葬陽
山子孫遂爲吳人

蔣堂字希魯本宜興人徙于蘇祥符五年進士
任侍御史論禁中火宜責躬修德不必歸咎

宮人郭皇后廢極論不可出爲淮南發運使
薦部吏二百貢累遷樞密直學士歷知應天
河中府洪杭益蘇州後十二年再守蘇遂謝
事以禮部侍郎致仕家於靈芝坊詳見園亭門堂
爲人修潔遇事不少屈好學工文詞延譽晚
進至老不倦卒年七十五有吳門集二十卷
其絕筆詩云歸來深隱太湖濱天與扶持百
歲身雖是浮雲隔雙闕丹心愛戴在君親忠
厚之氣終始如此

陳郢隱居里中以琴書自樂丁晉公甥也欲薦以官拒之續圖經并其弟之奇謂之兩高士父殿中丞質亦以德行著稱鄉里

陳之奇字虞卿曾祖贊明事錢氏爲中吳軍節度推官所謂丁陳范謝四長者之奇天聖中禮部試第四御試不得第居鄉里十年無仕進意母丁晉公之妹晉公欲官之之奇兄弟每力辭而勉使復應舉不得已復起得及第李瑋尚秦國大長公主詔舉經術仁義者爲

隴西郡王宅教授數月告歸卽致仕郡留其奏不可時年未五十未幾詔賜金錢復起之卒不起終太常博士之奇孝於親約於身信於朋友篤行好學知道心泊如不爲聲利所遷其退歸與鄉人同憂樂赴人之急至于州縣無所避州縣以之奇至誠亦不爲疑平居靜默與人言忠孝立身亶亶不倦人莫不以爲君子每出乘羸駒里巷小人見之必斂然曰此吾陳君子也四方賢士大夫至吳必問

陳君所在爭欲一見之王岐公聞其喪曰吾嘗與陳君相從於閭門之下觀其言出入仁義之際真君子哉乃爲誌其墓而題曰太常博士致仕陳君子之墓云

方惟深字子通其先自莆陽徙吳爲吳下鄉先生文學行義與樂圃朱長文同爲一世所宗事具程俱所撰墓銘其略曰子通幼有稱鄉貢爲第一試禮部不第卽棄去吳下有田一廛與其弟躬中入耕獲間則讀書至於黃帝

老莊之書養生爲壽者之說及西方別傳皆得其大指平居視之猶木雞也及其論議古今道理窮覈至到確然莫能移常以雅道自娛一篇出人爭傳誦王安石以謂精詣警絕元白皮陸有不到處以韋布之士閉關陋巷而孝友清介之風隱然稱東南有司舉貢籍以年格應補軍州助教者就賜敕牒袍笏於其家得興化軍助教拜受唯謹初年四十無子其弟有子以謂吾先人有後足矣卽屏居

於外預知死期期至不亂喪葬皆有治命云
楊懿孺字彝甫其先自浦城徙長洲以行義隱
處與方子通同時號吳中二老焉或仕或不仕皆
撰墓銘略云吳郡有二老焉或仕或不仕皆
隱者也居城之東北曰方公居城之東南曰
楊公卽懿孺也懿孺少孤力學言行相顧朝
無夕儲讀書哦詩泊如也神夷氣昌未嘗有
飢寒憂雖閭里不盡知其貧崇寧二年特奏
名後調南昌主簿居一年忽載妻子歸吳下
且告老以承奉郎致仕平居直心自信不知
世間有傾巧事自未仕及老于家不入州縣
不事鄉里請謁間一過所親厚歲不過數四
雖嘗出而仕人猶謂隱者

